



**PRIMEIRO  
MINISTRO**  
VIII GOVERNO CONSTITUCIONAL

Diskursu hosi S.E. Primeiru-Ministru Taur Matan Ruak nian iha Serimónia Fó Pose ba Dr. Rui Augusto Gomes

*Segunda-Feira, loron 23 fulan-novembru tinan 2020*

Sua Exelénsia Prezidente Repúblika, Sr. Francisco Guterres Lú Olo no Espoza

Sua Exelénsia Prezidente Parlamentu Nasionál, Sr. Aniceto Guterres no Espoza

Sua Exelénsia Prezidente Tribunál Rekursu, Sr. Deolindo dos Santos no Espoza

Sua Exelénsia Eis-Primeiru-Ministru I no VII Governu Konstitusionál, Sr. Mari Alkatiri

Sua Exelénsia Konselleiru Másimu Partidu Kmanek Haburas Unidade Nasionál Timor Oan (KHUNTO), Sr. José dos Santos Naimori Bucar

Suas Exelénsias Eis-Titulár sira Órgaun sira Soberania nian

Sua Exelénsia Prezidente Autoridade Rejiaun Administrativa Espesiál Oekusi (“RAEOA”) no Zona Espesiál Ekonomia Sosiál Merkadu Timor-Leste (“ZEESM-TL”), Sr. Arsénio Paixão Bano

Suas Exelénsias Reverendísimas Senhor Arcebispo Dili no Senhor Bispo sira Baucau no Maliana

Distintu Senhor Membru sira Parlamentu Nasionál nian

Distintu Senhor Membru sira Governu nian

Exelentísimus

Senhor Prokuradór-Jerál Repúblika

Senhor Xefe Estadu-Maiór Jenerál FALINTIL – Forsa Defeza Timor-Leste

Senhor Komandante Jerál Polísia Nasionál Timor-Leste

Exelentísimus

Senhor Representante Korpu Diplomátiku nian sira

Senhor Representante Organizaun Internasionál no Ajénsia Kooperasaun nian sira

Senhor Representante Organizaun Sosiedade Sivil nian sira

Senhoras no Senhores

Distintus Konvidadus

Iha fulan-maiu liubá, Sua Exelénsia Prezidente Repúblika nomeia ona no fó ona pose ba Doutór Fernando Hanjam, nu'udar Ministru Finansas husi Governu Konstitusionál VIII.

Infelizmente, maske empeñu no determinasaun ne'ebé nia hatudu ona bainhira hahú haknaar an iha departamentu governamentál ida-ne'ebé kompleksu no sentráliu ba funsionamentu Governu no administrasaun públika tomak nian, iha tempu ne'ebé difisil no ezijente liu, iha ne'ebé ita halo preparasaun ba proposta Orsamentu Jerál sira Estadu nian ba tinan 2020 no ba 2021, Doutór Fernando Hanjam sei la bele kontinua serbisu ne'ebé nia hahú tiha ona, tanba razaun saúde.

Tanba situasaun ida-ne'e, hatudu duni sentidu responsabilidade, devér ba Estadu no lealdade ba Xefe Governu nian, iha loron 5 fulan-novembru tinan 2020, Doutór Fernando Hanjam apresenta ona mai ha'u ninia pedidu demisaun ba ninia funsaun sira nu'udar Ministru Finansas, tanba hatene katak ninia saúde la permite ba nia hodi asume kna'ar nu'udar lideransa Ministériu Finansas nian ho enerjia, serbisu no dedikasaun ne'ebé nia konsidera nesesáriu atu konkretiza objetivu sira ne'ebé Governu Konstitusionál VIII propoin ona.

Tanba servisu ne'ebé hala'o ona ba Governu Konstitusionál VIII, no tanba sentidu responsabilidade no lealdade ne'ebé hatudu ona ba Primeiru-Ministru no ba Estadu, publikamente ha'u hato'o ha'u-nia gratidaun ba Doutór Fernando Hanjam, no ha'u formula votus ba ninia saúde sei rekupera filafali no lalais.

Iha biban ida-ne'e, ha'u mós hakarak rekonhese publicamente kolaborasaun husi Senhor Marí Alkatiri no senhor José Naimori sira-nian, líder husi partidu sira ne'ebé apoia Governu Konstitusionál VIII iha Parlamentu Nasionál, iha identifikasaun personalidade nian ne'ebé bele asume lideransa Ministériu Finansas nian no enfrenta dezafiu sira ne'ebé nia hasoru.

Ikusliu, liafuan gratidaun ne'ebé kle'an ba Sua Exelénsia Prezidente Repúblika, ba kompriensaun ne'ebé hatudu ona no kolaborasaun ne'ebé fó ona, relasiona ba nesesidade hodi halo substituisaun ba Doutór Fernando Hanjam ba ninia funsaun sira nu'udar Ministru Finansas, no, nune'e, hodi kontribui desizivamente ba estabilidade Governu no ba normalizasaun ba ninia funsionamentu.

Senhor Prezidente Repúblika,

Distintus konvidadus

Sentralidade ezekeusaun nian husi Programa Rekupersaun Ekonómika, iha kuadru ezekeusaun orsamentál ba tinan oin nian, fó hanoin katak lideransa husi departamentu governamentál nian ne'ebé responsavel atu koordena ezekeusaun orsamentál tenke ema ne'ebé maka bele, aleinde iha experiénsia governativa no koñesimentu kle'an iha administrasaun finanseira Estadu nian, mós hatene no kompriende nesesidade fundamentál ezekeusaun nian kona-ba medida sira ne'ebé prevee ona iha dokumentu ne'ebá, atu ita bele alkansa susesu ne'ebé ita hakarak kona-ba kreximentu ekonómiku no koezaun sosiál.

Ho hanoin ida-ne'e, ne'ebé ho artikulasaun di'ak ho lideransa partidu nian sira ne'ebé mak apoia Governu iha Parlamentu Nasionál, ha'u konvida Doutór Rui Gomes atu dezempeña funsaun sira Ministru Finansas nian, ne'ebé nia hatán duni ba konvite ne'e, maske nia hatene katak iha dezafiu importante sira ne'ebé nia sei hasoru. Ha'u aproveita biban ida-ne'e atu agradese no hahii sentidu misaun aas nian, ne'ebé Doutór Rui Gomes hatudu bainhira aseita atu asume responsabilidade governativa sira ne'ebé mak ho dezafiu boot, ne'ebé halo parte ba kargu Ministru Finansas nian.

Desizaun ida-ne'ebé mak tetu ona ho didi'ak, konsiente no fundamentada, la'ós de'it iha esperiénsia kle'an, ne'ebé nia hetan iha kargu no funsaun oioin ho responsabilidade boot, maibé



mós iha misaun ne'ebé daudaun ne'e nia asume, liuhusi pedidu husi ha'u-nia Governu atu lidera Komisaun ba Elaborasaun Planu Rekuperasaun Ekonómika nian, entre fulan Junhu no fulan Agostu.

Esperiénsia akadémika no profisionál ida, iha domínio ekonómiku, orsamentál no finanseiru, iha ne'ebé ita bele destaka estudu sira ne'ebé dezenvolve ona kona-ba kombate hasoru mukit, kona-ba promosaun ba kreximentu ekonómiku no sosiál ne'ebé sustentavel, kona-ba apoio ba mudansa estruturál sira no kona-ba defeza ba distribuisaun rendimentu nian sira ne'ebé justa no ekuitativa.

Kualidade sira ne'e, nu'udar Primeiru-Ministru no nu'udar sidadaun husi Repúblika ida-ne'e, ha'u valoriza no konsidera importante tebes atu atinje objetivu no prioridade sira ne'ebé asume ona husi ha'u-nia Governu, liuliu kriaun husi empregu sira ne'ebé dignu, diversifikasaun atividade ekonómika no redusaun husi dependénsia exesiva sira, ho forma estruturál, ne'ebé maka sei afeta ita-nia Nasaun.

Doutór Rui Gomes, iha nia méritu boot, matenek no experiénsia kle'an atu dezempeña ho di'ak funsaun públika sira ne'ebé difisil ho karakter ezekeutivu iha ne'ebé ohin nia simu ona pose, no husi ha'u-nia pontu-vista, nia ema ne'ebé maka loloos atu lidera destinu sira Ministériu Finansas nian, to'o lejislatura ida-ne'e nia rohan.

Ha'u aproveita biban ida-ne'e atu hato'o ha'u-nia satisfasaun no haksolok ne'ebé kle'an, tanba bele konta ho Doutór Rui Gomes iha ha'u-nia Governu, no ha'u dezeja votus saúde di'ak no susesu ba mandatu ne'ebé hahú agora.

Iha biban ida ne'e, ha'u mós hakarak hato'o ha'u-nia apresiasaun no gratidaun espesiál ba Sua Exelénsia Vise-Ministra Finansas, Dra. Sara Lobo Brites, ne'ebé durante períodu rekuperasaun saúde Ministru Titulár nian, asume ona knaar ida ne'e, nu'udar Ministra Finansas interina. Ha'u fiar katak sei kontinua atu kolabora ho Doutór Rui Gomes, iha lideransa Ministériu Finansas nian ne'ebé nia konhese di'ak ona no ba funsionamentu di'ak no ne'ebé nia kontribui desizivamente.

Ikusliu, ha'u husik hela liafuan agradesimentu ba sidadaun, traballadór, família, comunidade, emprezáriu, parseiru dezenvolvimentu no organizaun naun-governamentál sira, husi imi hotu-hotu nia apoiu no konfiansa ne'ebé fó nafatin ba ami, durante tinan 2020 difisil ne'e.

Governu rekonhese no agradese ba imi-nia rezisténsia, reziliénsia no dixiplina iha implementasaun ba medida oin-oin ne'ebé adopta ona husi Governu, durante tinan ne'e, no liuliu durante períodu 7 (hitu) estadu emerjénsia nian ne'ebé deklara tiha ona.

Na'i Maromak haraik bénsaun mai ita hotu!

Obrigadu barak

